

四庫全書

集部

欽定四庫全書

集部

明詩綜卷三十四

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶臺臣潘魯起

謄錄監生臣楊恪

欽定四庫全書

明詩綜卷三十四

翰林院檢討朱彝尊編

李夢陽八十首

夢陽字天賜更字獻吉慶陽人徙扶溝弘治癸丑進士授戶部主事轉員外郎應詔陳言彈壽寧侯張鶴齡繫錦衣獄旋釋之進郎中代尚書韓文草奏劾劉瑾坐姦黨致仕

一云降山西布政司經歷復逮

繫得釋起江西提學副使恃氣陵轢臺長訐奏罷

官寧庶人既誅坐為庶人撰陽春書院記獄辭

連及尚書林俊力持之得免卒後弟子私謚文

毅天啓初追謚景文有空同子集

何仲默云詩必以盛唐為

尚宋人似蒼老而實疎鹵元人似秀峻而實淺俗僕詩不免元習而空同諸作間入于宋譬之于樂絲竹之音要眇木革之音殺直若獨取殺直而并棄要眇之音何以感情飾聽也試觀江西以後之作辭艱者意反近意苦者辭反常讀之如拙鞞鐸耳崔子鍾云空同慨然興復古之思自唐以後無師焉顧華玉云獻吉詩卓爾不羣或失則痛矯枉之偏不得不然又云空

同言作詩必須學杜詩至于杜如至員不能加  
規至方不能加矩矣此空同之過言也夫規矩  
方員之至故匠者皆用之杜亦在規矩中耳何  
得就以子美為規矩邪王子衡云獻吉游精  
于秦漢割正于六朝以柔澹為上乘以沉著為  
三昧以雄渾為神樞以蘊藉為堂奧會詮往古  
之典用成一家之言巨者曰融小者星列長者  
江流濶者海受洋洋燿燿無所不極後有知言  
之選歎賞不暇尚安能為之揚抑哉徐子容  
云空同子詩衆體兼長渾厚沉著格高調古尤  
工七言古歌辭開闔縱橫人不能述者獨摹寫  
曲盡雄健可喜即錯置杜甫高適歌行中莫能  
辨也黃勉之云空同先生靈蛇早握天池獨  
運黃鍾特奏白雪孤揚主張風雅深詣堂室樂  
府古詩駉淫漢魏而覽眺諸篇逼類康樂近體  
歌行大陵太白往括可凌後括難繼明興以來

一人而已陳約之云弘治中文教大起學士輩出力振古風盡削凡調一變而為杜則李何為之倡  
揚用修云弘治間文明中天古學煥日藝苑則李懷麓張滄洲為赤幟而和者多失于流易山林則陳白沙莊定山稱白眉而識者皆以為傍門至李何二子一出變而學杜壯乎偉矣又云空同以復古鳴弘德間觀其樂府幽秀古艷有饒歌童謠之風其古詩緣情綺靡有徐庾顏謝之韻而人但稱其律詩予謂空同之可傳者不在律空同之律少陵之餘瀝遺肺耳  
任少海云獻吉詩如媧皇鍊石補天奔走百靈雷電日月星辰悉踰爐冶  
徐子元云本朝詩莫盛國初莫衰宣正至弘治中西涯唱之空同大復繼之自是作者森起雖格調不同于今為烈又云空同崧高之秀上薄青冥龍門之派一瀉千里  
穆敬甫云李詩雄奇高古律法嚴整貫

少陵之壘而拔其赤幟 邵弘齋云國初詩是  
元如楊鐵厓解大紳成化間是宋如陳白沙莊  
定山至弘德來駸駸乎盛唐矣如何大復李空  
同 皇甫子循云薛君采詩俊逸真憐何大復  
麤豪不解李空同夫大復未足於俊逸空同不  
全于麤豪也 王允寧云空同有神交無方之  
用有精純不雜之體縱橫奇正不一其裁粹美  
同也珩琚璜璫弗一其形溫柔同也至倒插頓  
挫之法自少陵善用之後空同一人而已學者  
未覩其大漫試詆醜以空同掠古市美比之剽  
掠嗟乎空同賦才神解能自作古假令與李杜  
二豪並生當代不為李則為杜矣 徐伯臣云  
獻吉力持氣格濟以葩豔可謂雅道中興惜其  
和平之氣未舒悲涼之情太勝 袁永之云獻  
吉發憤慧業埽蕩陳言吐詞則振羽沉宮宣藻  
則日光玉潔維時徐生虎視于荆吳邊丞蛟躍

於齊魯何子揚瀾于河洛而君騰蹕蹂躪總統  
包容所謂無可無不可者也周允大云獻吉  
仲默一代絕倡邈焉寡儔莫子良云近世譚  
藝之士獨稱空同大復二家至曰廣長數千里  
上下數千年始得二人其見慕如此豈不以二  
子詩遠追蹤于少陵視三百篇指義特近哉  
何元朗云楊東里李西涯詩猶治元人之習至  
空同出遂極力振起之仲默廷實昌穀諸人相  
與附和而古風遍域中矣王元美云李獻吉  
如金翅摩天神龍戲海又如韓信用兵多寡如  
意排蕩莫測又云獻吉才氣高雄風骨道利天  
授既奇師法復古手闢草昧為一代詞人之冠  
要其所詣亦可略陳騷賦上擬屈宋下及六朝  
根委有餘精思未及擬樂府自魏而後有逼真  
者然不如自運滔滔莽莽選體建安以至李杜  
無所不有第比謝監未是初日芙蓉僅作顏光



祿耳七言歌行縱橫如意開闔有法最為合作  
五律及五七言絕時詣妙境七言律雄渾豪麗  
深于少陵抵掌捧心不能厭服衆志又云成弘  
之際頗有俊民稍見一斑號為巨擘然轍不及  
古中道便止搜不入深遇境隨就北地矯之信  
陽嗣起昌穀上翼廷實下毗敦古昉自建安挾  
華止于三謝長歌取裁李杜近體繼軌開元一  
埽叔季之風遂窺正始之塗天地再闢日月為  
朗詎不美哉又云國朝習杜數家華容孫宜得  
杜肉臨清謝榛得杜貌華州王維禎得杜一支  
閩中鄭善夫得杜骨就其所得亦近似耳惟夢  
陽具體而微又云涵洪并纖與亭毒並吾推獻  
吉然不能諱其渾 吳明卿云空同詩縱橫跌  
宕搖五岳而凌滄洲 胡元瑞云李獻吉手擘  
盛唐之派可謂達摩西來獨闢禪教又如曹溪  
卓錫萬衆皈依 陸羽吉云成弘以降北地信

陽諸君子出執牛耳以凌厲詩壇字內譚藝之士率嚮往之然蒼素混質繁音亂雅揣摹攫攘勦襲其近似者以為名往往炫色澤而乏神理程之于古無當也黃清甫云昔陳思總東京之闕謝客振江表之衰子昂變陳隋之靡今李公夢陽洵宋元之陋斯文肇起實由于茲厥功邈矣其詩專意上摹述遵故轍斷自漢魏迄于少陵少陵以下薄不經目故能近謝靡曼遠標道舉一篇一詠咸有所屬無論堂室直將並驅豪雄之氣矯然千仞之上如時來屠沽奮跡往英雄傷斗然一峰上不信萬山開中宵見海日南斗豁天門斯並純任骨力振絕鉛華故能獨挽頽波屹為文柱故常之才難與慮始王伯穀云明興以來作者絕少逮乎正統以後則益猥弱雕瑣無足采觀李君崛起關隴蛟騰虎視力挽七朝之廢古必漢魏律必盛唐一時海岳

英靈之士翕然超之風雅之學亦遂復振吾獨  
惜其調高而意直才大而情疎體正而意庸力  
有餘而巧不足也何則矯枉太過和平不及摹  
仿刻深陶鎔未暇此猶戰國嬴秦之後繼以炎  
劉方其持寶鐔斬白蛇除煩草削苛政其功非  
不快也然問其詩書則陸生爾矣禮樂則叔孫  
通爾矣此李君之詩撥亂反正之力多粉飾太  
平之事少所謂可與創造難與守成者也馮  
元成云空同雄渾悲壯深于少陵宇宙間異色  
絕饒孫文融云空同格律雄渾真無可疵其  
古詩更高絕近代罕兩馮開之云空同深嗜  
而冥契者杜陵故得其神理而面目隨之江  
進之云空同于鱗世謂其有復古之力然二公  
固有復古之力亦有泥古之病彼謂文非秦漢  
不讀詩非漢魏六朝盛唐不看故事凡出漢以  
下者皆不宜引用噫何其所見之隘也夫詩人

所引之物皆在目前各因其時不相假借如雖  
鳴螽斯桑扈蟋蟀樛木天桃茅苕葛藟是三百  
篇所用之物也降而為離騷則用芷蕙荃茝木  
蘭菊英蛟龍鳳皇文虬赤螭曾有一物假借於  
毛詩乎又降而為唐人之詩則用江梅岸柳澗  
草林花乳燕鳴鳩羣鴉獨鶴曾有一物假借於  
離騷乎非不欲假目到意隨意到筆隨自不暇  
舍見在者而他求耳至于引用故事則凡已往  
之事與我意思互相發明者皆可引用不分今  
古不論久近乃曰漢以上故事方用此特有見  
于漢家故事字眼古雅遂為此言其實繫用之  
善不善非繫于古不古也 陳卧子云獻吉志  
意高邁才氣沉雄有龍罩羣俊之懷其詩漢魏  
以至開元各體見長然崢嶸清壯不掩本色其  
原蓋出于秦風 曹潔躬云獻吉雖產于秦其  
父正教授封丘遂徙家大梁故登科錄直書河

南扶溝人居於康王城莫于大陽山麓然則李  
何皆中州人矣李王後起以中原二子自居王  
稱李云人龍自起中原卧李稱王云高卧中原  
堪有客又云足知上國羣公疏猶作中原二子  
看蓋隱然自比於李何也孫豹人云先生五  
言古詩本於陸謝句中皆有筋骨七古能以紀  
事無諷議誦之風颺烈烈五律意象俱妙七律  
高亮間入于宋絕句信手拈來調絕今古俞  
右吉云獻吉五言古詩康樂以後一人七言近  
體少陵以後一人七言絕句太白以後一人七言  
五言近體少遜前賢頗有才多之恨然如江從  
樹裏斷山入雨中無隴樹迷關道吳山蔽驛樓  
揚鞭指河洛立馬說周秦楚越窗中地江山戰  
後容風雲餘霸氣吳楚混前朝塞口孤城斷峯  
腰細澗分林疎山盡出風順櫓齊開暮雨津城  
樹春帆水國樓江山百戰後登眺兩人初爽氣

固殊倫也

靜志居詩話成弘間詩道仿落雜而多端臺閣諸公白草黃茅紛蕪靡蔓其可披沙而揀金者李文正楊文襄也理學諸公擊壤打油筋斗樣子其可識曲而聽真者陳白沙也北地一呼豪傑四應信陽角之迪功特之律以高廷禮詩品浚川華泉東橋等為之羽翼夢澤西原等為之接武正變則有少谷太初仿流則有子畏霞蔚雲蒸忽焉丕變嗚呼盛哉獻吉五古源本陳王謝客初不以杜為師所云杜體者乃其摹仿之作中多生吞語偶附集中非得意詩也至效廬駱張王諸體特游戲耳惟七古及近體專仿少陵七絕則學供奉蓋多師以為師者其謂唐以後書不必讀唐以後事不必使此英雄欺人之言如江湖陸務觀司馬今年相宋朝秦相何緣

怨岳飛等句非  
唐以後事乎

河之水歌

二章

有序

河之水歌李子為其子作也以子追不及

河之水流濺濺望父不見立河干

河水流流舟子搖櫓東方漸明我不得渡

招隱山辭

三章

山之桂青青秋風綠葉冬不零王孫幾時歸山空蕙草

摧

山之草萋萋春風花發桃源迷子規啼竹陰日暮愁人  
心

秋之夕螢飛山風霜露霑人衣洞門翳寒蘿奈茲華髮  
何

左袒行

陵曰不可平曰可安劉者誰勅與我寄不信祿不入軍

左袒計安出

朱近修云此仿  
西涯樂府而作

車遥遥



車遥遥遥遥復邁邁望見秋塵起不見車輪轉知在秋  
塵裏

雁門太守行

雁門太守汝何人治邦三月稱明神我有牛羊賊不來  
掠我有禾黍人不敢割昔我無衣今有袴著我思禮拜  
太守太守不見憐但聞太守身姓邊紫髯廣額聳兩顴  
太守出門四牡駢駢後擁阜益前導兩麾行者盡辟易  
居者不敢窺苟問太守何所之云訪城南皇甫規

楊用修云

神似古樂府魏晉  
以下絕無僅有

內教場歌

雕弓豹韃騎白馬大明門前馬不下徑入內伐鼓大同

邪宣府邪將軍者許邪一解武臣不習武奈彼四夷西內

樹旗皇介夜馳鳴礮烈火嗟嗟辛苦一解

轅駒歌

世徑互險夷富貴安所需昔為櫪中駿今為轅下駒白

日仰悲鳴青雲立踟躕未蒙主人顧何繇效馳驅朝思

碣石津夕睇流沙隅常恐侶凡蹇棄捐中路衢

雜詩二首

西國有佳人獨立青雲端容豔若桃李左右佩芳蘭含  
思理玉琴泠泠一何閒更節有餘悲曲終再三歎借問  
歎者誰中意難自宣沉吟攬衣帶仰視鳴鶴翻思阻望  
不申何況隔丘山

枕棖蝕以傾梁棟誠獨難流言播四國周公疑患涼  
颼激頽景奄忽不可攀衆羽日續紘朱鳥戢其翰殺身

苟無益去去從所安傷哉式微詩千載起余歎

發京師二首

驅車彰義門遙望郭西樹冠蓋耀青雲車馬夾廣路威  
風何赫奕各蒙五侯顧回飈動地起白日倏已暮棄擲  
委蔓草榮華若朝露亮無金石交人生豈常故絺綌足  
禦冬誰念紉與素愜彼白華篇氣結不能慙

薦蘿附松柏枝葉固相因行子戀儔匹况遇同鄉親北  
風起河梁日暮多飛塵攜手同車歸駕言西適秦道遠

長渴飢客子懷苦辛仰瞻天漢流夜永不得晨駢馬媚  
其曹鳴雁各求羣明星出東方照見車下人夙興即往  
道登彼高路津還顧望京邑愴焉何所陳

衛上別王子

晨風應候至雞鳴各嚴車我今游宋中子當旋舊閭僕  
夫理前綏轅馬悲鳴趨一別阻秦周相望萬里餘首春  
霜露重厚汝征衣襦昔為同袍士今在天一隅故者日  
以遠疇能察區區

贈徐禎卿

獨處忽不懌攬衣循東廂樹木何修修春風起飄揚我  
友駕在門告言適江湘倉皇挈玉壺追送臨河陽顧瞻  
兩飛鳧並戲水中央翩翩屬羽翮鳴聲一何長奈何游  
客子一別永相望時澤亮有周天命固其常薄終義所  
劣別離庸詎傷懿彼回路贈慷慨申此章

贈劉氏

矯矯雲中鵠忽忽晨南翔連翩客游子駕言逝何方霜

露日夜零東路悠且長意欲從子逝我馬玄以黃徒思  
諒無益欲置難遽忘愛子千金軀雙親在高堂

時命篇

代馬不戀越荆禽豈巢燕鸛鵠渡汶水君子憂未然奈  
何客游子率爾辭故山行獸顧丘林出雲有歸還交  
聲利塗軒車日駢闐誰念牛下人悲歌夜中歎豪門有  
棄襦我衣恒不完張儀懼諸侯泄柳乃閉關貧賤豈盡  
愚時命當自安

述憤二首

小草生枯桑芊芊競芳辰雖云殊本根寄託各有因自  
我罹幽囚忽焉經決旬我兄千里餘渺渺長河津妻子  
日望予蒼蒼隔西鄰所幸二三友笑言越昏晨宵鐙促  
燕膝昵語忘苦辛患難苟相得毋論骨肉親

明月出東方徒行反家室室人走相訊問我何由出明  
知非夢寐欲辯仍自失喜極雙涕零轉面各銜恤垂鐙  
照絳卷浮埃滿朱瑟愁言卒未傾忽復見晨日



雜詩

宛宛春田鳩飛鳴柔且閒一朝化為鷹肅肅厲羽翰衆禽不敢並孤立秋雲端鳥旣不自知人胡究其然

予懷百門山水尚矣頗有移家之志交春氣熙忻焉獨徃述情遣抱示同好數子

浮海傷固窮逾河歎誠邁濯纓萬里流高視九州外功成奔運徂氣至流飈代淒淒秋柯零冉冉春條媚周覽倦河壖孤悰冀巖瀨道以沉寂超賞與崇深會豈惟肆

遠情亦因謝塵籟想山中人風吹女蘿帶折麻凌險  
岵采秀越森蒼着彌志終申獨往竟誰礙崑崙太行峰  
崑崙百門對抗手別故懽乘雲弄烟瀼

自大過渡河趨陂沙岡

凌春遠行邁游目恣沿越漸辨林中曙遽失霞上月觸  
物誰為情悲歎曷可歇載登隋疆場况眺宋城闕陽坡  
散初柳陰曲峙寒雪只此判氣候豈必殊燕粵潛潛濁  
河駛寥寥晨風發揚帆截驚瀨倚櫂望窮髮鳬雁眇難

即汀蘭翠堪纈美人既莫期天路復幽絕陂岡鬱參錯  
岸沙皓明滅日暮孤雲興何以慰忡悵

陽武詠懷陳平張蒼遂及博浪之事

玉璽戒不力金鏡淪無光大人既龍興烈夫亦鷹揚伊  
人各乘時矯若孤雲翔韓稚豈在屢秦氣日以喪六奇  
佐揮戈五運開靈昌時來屠沽奮跡往英雄傷平生冀  
風期況乃逾故疆灑淚越修垵含淒遡河梁古墳密嶠  
嶢春沙鬱茫茫徒瞻松柏路詎甲椒蘭芳遺榮竟何尤

任智終自戕美彼赤松遊援筆即此章

覽遊百泉乃遂登麓眺望

束髮懷幽竒覽籍兼有遇來登百門泉果協佳勝趣  
必員波踊藹藹浮陽聚止坎渟泓洌激石迅湍注昔聞  
滄浪濯今解川上喻豈惟傷衛歌兼以發蒙慮况值春  
序中羣物已改故菰蒲冒清深鱗介各有慕行美浴渚  
鳬靜對棲雲鷺巖扉空潭影林藹變朝暮極目北上帆  
朝宗感游寓

德安趨潯陽

始征晨風息雲流日色展登陸艱且澀厲澗一何緬維  
時仲秋交颼颼林颼卷綠竹垂我車丹花映行幘冒巖  
維有松繡石盡成蘚攀蹇雖多悅亘頓乃勞倦日中迫  
廬岳蹊徑愈回蹇雲湧連遙嶠雨暗失近巘奔崩萬壑  
會嶮絕一徑轉遽訝川梁沒幸遇石瀨淺道以習坎利  
用待旣濟顯介石諒益固巨川豈遂眩誰哉能豫謀隨  
寓斯可遣

白鹿洞徧覽名跡

情高忽凌厲步健輕巉緇葛弱亦須捫厓滑每獨踐涉  
清愛重屢探阻遺驚眩始茲陟五峯遂憇松下巘巖桂  
紛始華石耳翠可卷追想白鹿跡伊人竟何遣觸端緒  
自縈薜荔況在眼慨歎意莫置顧望日已晚夕湖浴岑  
峭流光滅蘭坂命酒寫幽獨鳴琴且游衍

始至白鹿洞

曠哉超世志緬邈平生思鬱壹眷名跡久注匡山陲南

涉枉嘉命果諧夙所期  
仲秋巖壑清宮館復在茲  
白石激寒湍巖蘿裊空基  
黯傷逝者往密慚來者追  
性同道豈隔塗異理空悲興  
言懷昔賢日竟眺前歧  
榛荒徒鬱紆林崦一何杳  
感情匪哀歎聊詠昭言垂

赴懷王山作

始臨清溪寺不謂茲路艱  
崎嶇踰南嶺轉見山鬱盤重  
陰起北谷凍雨響前壑  
志定邁孰禦勇往竟孤攀  
挽葛接懸狄架木凌飛湍  
律律巖壑變颯颯嵐風寒  
隔港望

絕岫寧寧已雲端

廣獄成還南昌候了

夕棲瑞洪渚遙覽渚北山相傳洪厓子乘雲自此間履  
跡今尚存其人邈莫攀粵予登征塗頻年涉閒關毀譽  
一嬰心寤言多所歎于茲誠跼蹐振衣躡前巖洛水并  
浩浩驚風蕩回川欲濟惜無梁颺輪儻中還

湘妃怨

采蘭湘北沚寒木澧南潯淶水含瑤彩微風託玉音雲



起蒼梧夕日落洞庭陰不知篁竹苦惟見淚斑深

宗子相云

顏謝逸響 宋  
韓文云深秀

### 自從行

自從天傾西北頭天下之水皆東流若言世事無顛倒  
竊鉤者誅竊國侯君不見姦雄惡少椎肥牛董生著書  
翻見收鴻鵠不知黃雀啁盜跖之徒笑孔邱我今何言  
君且休

### 西來行

冬廿六日十二月西來泛湖雨明滅雨寒著樹盡成雪  
天波靄靄路幽絕鵲鷓鴣禿鷲立如人銜魚避船偷眼噴  
雪晴獵夫會尋汝乘時早可收其身

土兵行

豫章城樓飢啄烏黃狐跳踉追赤狐北風北來江怒湧  
土兵攫人人叫呼城外之民徙城內塵埃不見章江塗  
花裙蠻奴逐婦女白奪釵銀換酒沽父老向前語蠻奴  
慎勿橫行王法誅華林桃源諸賊徒金帛子女山不如

汝能破之惟汝欲犒賞有酒牛羊豬大者陞官佩綬趨  
蠻奴怒言萬里入爾都爾生我生屠我屠勁弓毒矢莫  
敢何意氣似欲無彭湖彭湖翩翩飄白旗輕舸蔽水陸  
走車黃雲卷地春草死烈火誰分瓦與珠寒厓日月豈  
盡照大邦鬼魅難久居天下有道四尺守此輩可使亦  
可虞何況土官妻妾俱美酒大肉吹笙竽

楊用修云只以謠諺近語

入詩史而高古不可及孫豹人云贛州賊作亂都御  
史陳金奏調廣西狼兵征之土兵行所由作也此詩當  
與杜陵北征詩並傳

上元訪杜鍊師

宣王昔時乘八風御龍遊戲行煙空馬前兩兩侍玉女  
別館多在蓬萊宮朝天宮中舊時殿樓臺晝鎖無人見  
琉璃井塌青苔滿松柏森森月如練嗚呼往事難具陳  
燈火如山又一春北斗壇西訪隱淪我師黃衫白纓巾  
坐我更致西樓賓玉杯漱澹赤瑪瑙織罽四角銀麒麟  
酒肉山堆滿堂醉仙厨徃徃來八珍孝宗之朝五真人  
師也磊落當其倫自言召見親賜食曾把丹書獻紫宸

如今寂寞看春色銀魚玉帶無消息  
豈惟魚帶無消息  
欲語吞聲淚霑臆勸師對此莫酸辛  
世間萬事如轉輪  
且將芝草供生計聊與煙霞作主人  
月偏彩雲當牖生  
旋呼兩童吹玉笙聞師妙得逡巡術  
百壺倒盡還須傾  
古來仙子向誰在飲者翻垂千載名  
名垂千載亦區區  
酒闌燈昏夜復徂不見秦陵草已宿  
春生樹啼雙老鳥  
此時亦應羣帝趨金燈翠旗光有無

奉送大司馬劉公歸東山草堂歌

東山有草堂縹緲雲嶠孤前對祝融峰下瞰巴陵湖明  
公昔時此堂居麋鹿熊豕當牕趨洞庭日落風浪湧倒  
影射堂堂欲動慘澹誰聞紮芝曲獨善不救蒼生哭先  
帝親裁五色詔老臣曾受三朝祿此時邊檄多戰聲曳  
履謁帝登承明謝安笑却淮淝敵魏相坐測單于兵九  
重移榻數召見夾城日高未下殿英謀密語人不知左  
右微聞至尊羨自從龍去不可攀公亦卧病思東山湘  
娥含笑倚竹立山鬼窈窕堂之側上書苦死只欲歸聖

旨優容意悽惻內府盤螭縷金織賜出傾朝皆動色白  
金之鈿紅票記寶鈔生硬雅翎黑崇文城門水雲白是  
日觀者塗路塞城中冠蓋盡追送塵埃不見長安陌人  
生富貴豈有極男兒要在能死國不爾抽身早亦得君  
不見漢二疏千載想慕傳畫圖即如草堂何處無祿食  
覲竊胡為乎乃知我公真丈夫嗚呼乃知我公真丈夫  
二月四日部署宴餞徐顧二子

春日載陽官署幽東吳二子過我游庭空日斜吏人散

宵然何異經林丘今晨驚蟄暖氣達昨夜哀鴻呼故儔  
中庭古槐蒼蘚溽上有百鳥何啁啾倉庚交交刷其羽  
君看巨細各有求明時冠軒幾邂逅得暇胡不攀淹留  
自從去年識徐顧令我意氣傾南州徐郎近買洞庭柁  
顧子亦且錢唐舟浮生飄轉若飛藿倏忽聚散誰能謀  
風光爛熳况復爾願寫清壺消客憂故人苦稱不好飲  
舉杯入脣還復休妙歌時時激慷慨鄙夫何以荅綢繆  
嚴柝沉沉靜夜色北斗倒挂城南樓祗恐天明驅馬出



攬袂延望河之洲

苦熱諫屠參議

豫章之熱真毒淫六月已破仍不禁赤雲行空日在地  
萬里一望炎煙深東蒸扶桑榦欲槁黑河水乾龍不吟  
院松亭亭我所愛比遭摧炙無好陰縱令跣足欲何往  
此地寸冰如寸金層檐大廈尚喘喙矮屋茅堂淚滿襟  
滕王有閣高百尋閣下澄江清映心紫薇使者卧其上  
卷幔恰對西山岑赤腳門子搖大扇行坐吟哦揮素琴

幾欲往訪簿書積豈我無酒同誰斟亭午蘊隆潭水沸  
蛟蜃下徙龜鼉沉何況走原之獸棲枝禽嗚呼豫章之  
熱其苦有如此而我胡為營營與世爭華簪

徐子將適湖湘余實戀戀難別走筆長句述一代  
文人之盛兼寓祝望焉爾

崢嶸百年會浩蕩觀人文建安與黃初叱咤皆風雲大  
歷熙寧各有人憂金鼓玉何繽紛高皇揮戈造日月草  
昧之際崇儒紳英雄杖策集軍門金華數子真絕倫宣

德文體多渾淪偉哉東里廊廟珍我師崛起楊與李力  
挽一髮回千鈞天球銀甕世希絕鰲掣鯨翻難具陳洪  
川無梁不可越日暮悵望勞余神徐郎生長蘇臺陰二  
十作賦雄海濱竭來抱玉叩閭闔長安繡陌行麒麟是  
時少年誰最文太常邊丞何舍人舍人飄飄使南極直  
窮金馬探瀘津爾雖不即見顏色夢中彷彿形貌真余  
也潦倒簿書客諸公磊落清妙身大賢衣盍豈虛擲應  
須爾輩揚其塵休令黼黻怨岑寂要與琬琰增嶙峋海

陵先生雅愛士，晚得徐郎道氣伸。  
喬王款接雖不數，邇聞亦欲來卜鄰。  
驛騶造父兩相值，一瞬萬里誰能馴。  
都門二月芳草發，御溝楊柳垂條新。  
徐郎綰牒將遠適，使我旦夕生悲辛。  
為君沽酒上高樓，月前醉舞梨花春。  
天明挂帆向何處，鴻雁哀鳴求故羣。  
南登會稽探禹穴，西浮湘水吊靈均。  
洞庭波寒木葉下，峽口風急猿嘯聞。  
司馬太史有遺躅，歸來著書追獲麟。

朝飲馬送陳子出塞

朝飲馬夕飲馬水鹹草枯馬不食行人痛哭長城下城  
邊白骨借問誰云是今年築城者但道辭家別六親寧  
知九死無還身不惜身為城下土所恨功成賞別人去  
年賊掠開城縣黑山血迸鴉翎箭萬里黃塵哭震天城  
門晝閉無人戰今年下令修築邊丁夫半死長城前城  
南城北秋草白愁雲日暮聞鳴鞭

林良畫兩角鷹歌

百餘年來畫禽鳥後有呂紀前邊昭二子工似不工意

吮筆決皆分毫毛林良寫鳥祇用墨開縑半埽風雲黑  
水禽陸禽各臻妙挂出滿堂皆動色空山古林江怒濤  
兩鷹突出霜厓高整骨刷羽意勢動四壁六月生秋臍  
一鷹下視睛不轉已知兩眼無秋毫一鷹掉頸復欲下  
漸覺颼颼開風毛匹綃雖慘澹殺氣不可滅戴角森森  
爪拳鐵迴如愁胡皆欲裂朔雲吹沙秋草黃安得臂爾  
騎馱鐵草間妖鳥盡擊死萬里晴空灑毛血我聞宋徽  
宗亦善貌此鷹後來失天子餓死五國城乃知圖寫小

人藝工意工似皆虛名校獵馳騁亦未事外作禽荒古  
有經今皇恭默罷游燕講經日御文華殿南海西湖馳  
道荒獵師虞長俱貧賤呂紀白首金爐邊日暮還家無  
酒錢從來上智不貴物淫巧豈敢陳王前良乎良乎寧  
使爾畫不直錢無令後世好畫無好畋

錢選畫張果圖

張翁紙驢真有無錢也何意傳其圖印記雖明幅斷裂  
李侯完之亦奇絕所恨圖尾錢有詩就蛇添足將無癡

憶昔翁來集賢院入宮詔許肩輿便一日聲名人主動  
十年面目吾今見帝貌深沉玉榻雄侍人一異三人同  
漢皇信有瑤池降秦始枉慕蓬萊宮玄言未竟鈴殿風  
寸驢躍出青箱空有童追捉雙眼紅此驢蹏蹏盤當中  
李侯一睂一絕倒每稱獨苦嗟良工細觀張翁骨格古  
徐福五利寧其伍曰嬪真今天下疑遙歸轉覺皇心盡  
長生殿前牛女辰廣寒仙桂舞鸞身世間但識申師巧  
誰解中條放浪人



洛陽道

桃花馬金絡頭白面郎紫貂裘三月洛陽道垂柳蔭清  
溝溝水東流不記春花開花落幾回新東風日暮楊花  
起愁殺高樓獨倚人

朱仙鎮

水店回岡抱春湍滾白沙戰場猶倚柳遺廟只棲鴉萬  
古關河淚孤邨日暮笳向來戎馬志辛苦為中華

徐墓書張相國碑銘

不讀南州傳誰知高士心  
江城遺像在春日古祠深竹  
鳥嚶嚶合松牆靡靡陰曲江  
千載碣書罷淚盈襟

明遠樓春望

貢院初開閣春陰獨倚欄  
柳邊千艦聚花裏萬家殘風  
雨江聲壯兵戈地色寒斷腸  
沙塞雁羣起向長安

蔣仲舒云

含愁無限

酬京師友人見寄

浮雲悲故國積水起鳴雷  
不見長安日愁登古吹臺故

人三月別天上一書來欲問經行處山中杜若開

東陂秋汎

久說東陂好今陪上客遊  
綺筵開畫舫哀笛奮中流  
舞每低輕燕歌先起白鷗  
稍前休更進吾愛荻花洲

游兵

聞道新開口游兵未解圍  
只須殊死戰莫放隻輪歸  
漢月已自滿林鳥常夜飛  
早將書插羽天子日宵衣

環縣道中

西人習鞍馬而我憚孤征水抱琵琶寨山銜木鉢城裏  
瘡新罷戰插羽又徵兵不到窮邊處那知遠戍情

赴郊觀宿

城邊水色靜春茅苑外鶯啼拂露梢萬戶烟花臨複道  
九天宮殿鎖南郊霓旌夜發清溪繞彩仗晨飛碧樹交  
身到釣天渾不解坐聞仙樂下雲旂

謁陵

本朝陵墓傍居庸聞說先皇駐六龍一日玉輿回朔漠

遂令金殿鎖秋峯  
明裡袞職雖多預  
備物祠官豈盡供  
報祀獨知今上切  
每于霜露見愁容

秋懷三首

慶陽亦是先王地  
城對東山不啻墳  
白豹寨頭惟皎月  
野狐川北盡黃雲  
天清障塞收禾黍  
日落溪山散馬羣  
回首可憐鼙鼓急  
幾時重起郭將軍

宣宗玉殿空山裏  
野寺霜黃鎖碧梧  
不見虎賁移大內  
尚聞龍舸戲西湖  
芙蓉斷絕秋江冷  
環佩淒涼夜月孤

辛苦調羹三相國十年垂拱一愁無

大同宣府羽書同莫道居庸設險功安得昔時白馬將  
橫行早破黑山戎書生誤國空談裏祿食驚心旅病中  
女直外連憂不細急將兵馬備遼東

穆敬甫云諸作如  
雲屯高嶺風涌飛

流

雪後朝天宮

馬上城中見雪山白雲蒼霧滿燕關蓬萊咫尺無人到  
松柏黃昏有鶴還當日翠華游物外百年金殿鎖人間

浮塵擾擾江湖遠  
悵望巖棲不可攀

艮嶽篇

宋家行殿北山頭  
千載來人水一丘  
到眼黃蒿元玉砌  
傷心錦纜有漁舟  
金繒社稷和戎日  
花石君臣棄國秋  
漫倚南雲望南土  
古今龍戰是中州

潼關

咸東天險設重關  
閃日旌旗虎豹間  
隘地黃河吞渭水  
炎天白雪壓秦山  
舊京想像千官入  
餘恨逡巡六國還

滿眼非無棄繻者寄言軍吏莫嗔顏

別徐子禎卿得江字

我愛南州徐孺子明瑤美璧世無雙  
新從北極看南極便自吳江下楚江  
日落鷓鴣啼廟口水清斑竹映船牕  
禰衡王粲俱黃土千載何人復此邦

臺寺夏日

古臺高並鬱岩崑斷塔稜層鎖寂寥  
積雪洞門常慘慘炎天松柏轉蕭蕭  
雲雷畫壁丹青壯神鬼虛堂世代遙



惆悵宋宮偏泯滅二靈哀怨不堪招

漢江歌送范子之桂陽

漢江江上鷓鴣鳴漢江游客無限情青山落日下帆影  
芳草月明聞櫂聲黃鶴磯頭暮雲盡鸚鵡洲邊春水生  
莫倚仲宣能作賦洞庭南接桂陽城

秋望

黃河水遶漢宮牆河上秋風鴈幾行客子過壕追野馬  
將軍韜箭射天狼黃塵古渡迷飛輓日月橫空冷戰場

聞道朔方多勇略只今誰是郭汾陽

王元美云  
雄渾流麗

朱仙鎮

水廟飛沙白日陰古墩殘樹濁河深  
金牌痛哭班師地鐵馬驅馳報主心  
入夜松杉雙鷺宿有時風雨一龍吟  
經行墨客還詞賦南北淒涼自古今

東華門偶述

銀甕爛生光盤龍繡袂香但知從內出不省試何王

贈何舍人

朝逢康王城暮送大堤口相對無一言含悽各分手

豔曲

父母愛小女女是聰明子生不識鴛鴦繡出鴛鴦是

曉鶯

曉曉夢中迷流鶯碧樹西起來紅日照已度別枝啼

雲中曲 二首

黑帽健兒黃貉裘匹馬追奔紫塞頭相逢不肯通名姓

但稱家住古雲州

白登山寒低朔雲野馬黃羊各一羣  
冒頓曾圍漢天子  
健兒惟說李將軍

聖節聞駕出塞

千官北首望龍旂萬國車書集鳳闈  
八駿瑤池秋色遠  
幾時親擁白狼歸

送周判官

明鎧綠酒五花裘客舍新秋螢火流  
問君不飲真何事  
明日出城風葉愁

月夜過訪王子

率爾高陽飲博徒酒酣擊劍膽何麤金門貴客如相許

徑脫鸛裘付酒壚

蔣仲舒  
云語爽

夏口夜泊別友人

黃鶴樓前日欲低漢陽城樹亂烏啼孤舟夜泊東游客  
恨殺長江不向西

別李生

華也南來送我行青絲挈酒玉壺輕滕王閣下江千尺

一曲滄浪萬古情

送王韜

王郎口談金虎文自稱師是紫陽君挂帆明日忽南去  
影落龍江五色雲

經行塞上

天設居庸百二關祁連更隔萬重山不知誰放呼延入  
昨日楊河大戰還

歸塗詠古

河濟誰言不共流  
青春惡浪古懷州  
蕩搖少室三花樹  
倒映天壇白石樓

汴中元夕

中山孺子倚新妝  
鄭女燕姬各擅場  
齊唱憲王新樂府  
金梁橋外月如霜

京師春日漫興

十日不出花盡開  
城南城北看花來  
即教閉戶從花盡

莫遣看花不醉迴

蔣仲舒云語  
老而用意婉

送人之南郡

鼓刀朱亥本微寒  
白首侯嬴是把關  
不為千金增意氣  
祇緣一諾重丘山

明詩綜卷三十四



欽定四庫全書

明詩綜卷三十五

翰林院檢討朱彝尊編

何景明 七十八首

景明字仲默信陽人弘治壬戌進士授中書舍人轉吏部員外出為陝西提學副使有大復山

人集

顧華玉云仲默咳吐珠璣人倫之俊康德涵云漢魏以降訖于開寶世代既移音

節斯異修詞之士能無惡厥趨斯已優矣復能引而上之不沉流俗若仲默者豈非鮮哉王

子衡云仲默侵風匹雅欲騷儷選遐追漢魏俯  
視六朝溫醇典雅丰容色澤靡不備舉規治古  
調無所不極崔子鍾云空同方雅簡默稍飾  
蘄拔仲默恬淡溫醇不露才美李之雄厚何之  
逸健宜學者尊為宗匠孟望之云是時關中  
李獻吉濟南邊廷實以詩文雄視都邑何君往  
造語合乃力變之古自是操觚之士往往趨風  
漢魏矣徐子容云仲默昌穀咸懷雋才與獻  
吉相頡頏而二子秀潤清藻微之雄渾楊用  
修云仲默枕籍杜詩不觀餘家其于六朝初唐  
未數數然也與予及薛君采言及六朝初唐始  
恍然自失然終不若其效杜諸作也黃勉之  
云大復詩所謂使集者宣敬皇帝哀詔時作也  
家集者劉瑾柄國謝病還鄉時作也京集者直  
內閣制勅時作也喬景叔云國初詩尚襲元  
習宣正以來駸駸如宋矣先生與諸君子一變

而為漢魏盛唐起千載之衰屹然一代山斗  
樊少南云國朝詩文至弘治間極矣先生首與  
北地李子一變之古詩擬曹劉賦賞屈宋天下  
翕然從風盛矣哉千載一時也唐虞佐云仲  
默詩探冥挾奇增華漱潤軋晉魏而上之一唱  
三歎有餘音焉任少海云仲默詩如黃鐘在  
縣金石發作伶坊供奉之官莫不按宮商謹節  
奏其橫放處如項羽提三尺劍出江東不必斬  
將塞旗而登壇嘯咤千人皆廢徐子元云大  
復上追漢魏下薄初唐大匠揮斤羣工斂手  
蔡子木云明興百六十年詩文迄無定體自先  
生崛起汝南與獻吉發憤詞林超覽古始乃排  
斥羣疑歸之大雅何其雄也穆敬甫云何詩  
清淑典麗鑑然瑩然真得風人溫柔敦厚之旨  
李伯華云大復詩宗李杜文仿班馬字兼顏  
柳或與邊華泉李空同稱為海內三才或與崔

後渠稱爲中州二俊或與關中諸公并吳下徐  
迪功稱爲弘德七子王元美云仲默如朝霞  
點水芙蓉渠試風又如西施毛嫱無論才藝却扇  
一顧粉黛無色又云仲默才秀于李氏而不能  
如其大又云義取師心功期舍筏以故有弱調  
而無累句詩體翩翩俱在雁行又云李源風何  
源雅風故長變以明志耳觀其深沉莽宕激昂  
鼓壯音鳴嗒嗒悽悽忽正而奇正若嶽峙奇若海颶  
則李子哉是故少孫其緣情即象觸物比類靡  
所不遂譬坐璣馳文霞淪漪緒颺搖曳春花徐  
發驟而如淺復而彌深疑無喻何子而上者夫  
百鳥集于詞林而二子雄飛或羊角而橫舉或  
順颺而肆翔其九萬里同也又云鳴鸞佩瓊萬  
象咳唾吾推仲默然不能諱其孱汪伯玉云  
何李兩家遞爲桓文鼓旗鼓號天下獻吉非規  
矩弗由先生則務底于化于時主典則者張獻

吉主神解者附先生要諸至言各有所當顧其相直若繩墨而相濟若和羹即言逆耳而心莫逆耳視者勿察也黃清甫云大復詩因意著詞就詞成篇故情性冲逸興象閒雅曩與李公共驟詞場並崇雅道李則氣勢為勝公則風度為優彭子殷云仲默朗音亮節惜年勿遐羨而未至今也拔摘豪之獻吉壓于其上天下其誰信之屠緯真云空同雖極力摹古天才故高不沒雄渾之氣大復雖不盡摹古法度故才都無纖豔之習此其所以並傳也顧玄言云李何二學憲氣象弘濶詞采精確力挽頽風復增古雅選材兩漢嗣響三唐如航環越海輦賁踰嶠琳闕珠房輝燦朗映各成一家繼而海內翕然景從為明音中興之盛實二公之倡也二公古體並出楚騷詞漢樂府而憲章少陵者近體猶酷擬杜李古勝何如也雲出峽驚風涌湍

波瀾變幻層彩疊出何近勝李如石門寒瀑劍閣朝霞空中聲色高遠難攀薛君采云俊逸終憐何大復麤豪不解李空同則何似勝李邪胡元瑞云古今才人蚤慧者多寡大成大成者不必蚤慧蕪斯二者獨魏陳思次則唐王子安明則何仲默二子風華神秀絕自相當然子安尚沿六代綺靡仲默一掃千秋茅塞其識與功不可同日語也又云今人因戲吉祖襲杜意輒假仲默舍筏之說動以雞口牛後為辭此未覩何集者就仲默言古詩全法漢魏歌行短篇法杜長篇法王楊四子五七言律法杜之宏麗而蕪王岑高李之神秀卒自成一家冠冕當代所謂門戶堂奧不過如此古人影子之說以獻吉多用杜成句故有此規自是藥石非欲其盡棄根源別安面目也又云李以骨力勝何以神韻超學何不至不失雖龍學李不成終類畫虎

江進之云何大復詩何嘗規規摹古然已逼古人陳卧子云仲默姿制羸秀神氣和朗發微音吐芳訊今人有形穢之恥昔人稱王恭濯濯似春月柳又評諸書為瑤臺嬋娟庶幾近之詩云有美一人清揚婉子迨將仿佛焉矣曹潔躬云唐之士人稱輞川為詩天子浣花為詩宰相王諸體精緻毫髮無憾若是乎盡善盡美也杜硬語盤空類唐潦倒若似乎未盡善也而王聲價反讓杜數等問之解人會于心不能言其故也弘正間李何並起始而相應既而相規李扛鼎拔山千夫盡廢何霜葭玉樹照曜一時右何者美其醇而寡疵少李者指其生吞活剥不知李正藉短以擊長而何即長反見短明鏡無塵不若月中有物雖稱勑敵然終遜李一籌姚仙期云誦大復詩如聽雲中奏曲但覺洋洋盈耳孫豹人云大復五言句琢字鍊長歌滔

沿洪遠又復清奧絕倫五律全法右丞清和雅  
正七律自少陵以外無所不擬絕句獨不摹盛  
唐秀峻莫比要之驟而如淺復而彌深兩言其  
定評矣沈山子云大復楚謠漢風魏製晉造  
靡所  
不有

靜志居詩話弘正間作者倡復古學同調六七  
人李何實為之長李以秀朗推何何以偉麗目  
李其後互相抵牾何謂李搖鞞振鐸李謂何搏  
沙弄泥譬之針砭不中腠穴徒曉曉耳兩君皆  
負才傲物何稍和易以是人多附之薛君采詩  
云俊逸終憐何大復羸豪不解李空同自此詩  
出而抑李申何  
者日漸多矣

# 短歌行



冉冉秋序肅肅霜露蓄我旨酒召我親故鳥歡同林水  
歡同源矧我同鄉胡能弗敷耀靈西藏明燈在室更長  
夜良可以繼日園有藝菊庭有樹蘭秋芳是悅春榮曷  
觀高陵可升海水可測出門異路安知南北生年幾何  
去者日多子不我樂聽我短歌

陳卧子云弱于  
曹公壯于子桓

### 塘上行

蒲生寒塘流日與浮萍儔風波搖其根飄轉似客遊客  
遊在萬里日夕望故州鷓鴣鳴歲暮蟋蟀知凜秋暑退

厭絺綌寒至思重裘佳人不與處圓魄忽四周房櫳淒  
鳴玉紉素誰為收白雲如車蓋冉冉東北浮安得雲中

鴈尺帛寄離愁

陳卧子云婉麗清  
發不在建安下

梁甫吟

君不見泰山高高梁甫在其半古來封壇禪地無宮館  
厓崩壁圻鐵鎖斷秦碑漢碣何人看自從生人開九州  
九十六帝行權謀虎豹啖食龍蛇憂朝翻暮覆作雲雨  
立談坐笑生戈矛君不見田疆論功爭二桃齊門三丘

糴野蒿又不見魯連辭賞輕千金却秦救趙何雄豪眼  
前無人辨曲直身後聲名更何益拂袖空憐蹈海心護  
車枉負排山力梁生五噫歌莫哀東絕梁甫觀蓬萊千  
年雲開錦繡壁五色日抱金銀臺瀛洲方丈列仙占文  
成五利何能驗徐生入島竟不回博士儒生盡坑塹我  
吟梁甫君振衣世路崎嶇多是非琅玕芝草海岱曲釣  
竿拄杖從今歸

沈道初云豪放  
不在太白下

### 采蓮曲

急歌太短緩歌長清風夕回素雲翔雙鳬飛起向橫塘  
荷花不言空斷腸明月宛轉流西方月中白露霑衣裳  
紅顏青鬢安能常萬歲為樂莫相忘

獨漉篇

獨漉獨漉驅車折軸不畏折軸但畏車覆茫茫者猶生  
彼中衢雖有蘭蕙當門則鉏同行竊金相顧道左我實  
不知彼則畏我食荼知苦食梅知酸狐裘之敝可以禦  
寒有虎斑斑伏于林下我欲射虎愧無勁弩肅彼北風

渡彼中流豈不懷歸與子同舟

宗子相云絕  
似古逸詩

### 白紵歌

手中色絲舊所治青紅碧綠當自知  
衆中不語心向誰感君厚恩私念之  
東流之水不西馳泰山在前不可移  
紅顏白首奚足辭

### 行路難 二首

牀有織綺筐有織素請君視綺還視素  
憐新不如莫棄故樽中有酒盤有餐  
聽我為歌行路難衆中歡樂多志

氣豈知他人不得意白日有時不照地安得保君常不

棄

陳卧子云結句無嫌質直樂府本色也

天河熒熒西北轉織女牽牛不相見由來天上亦別離  
何怪人間有悲怨世情磷薄惡衰賤駕車騎馬有人羨

少年不得君愛惜紅顏勝人亦何益

吳明卿云悽惋

### 俠客行

朝入主人門暮入主人門思殺主仇謝主恩主人張燈  
夜開宴千金為壽百金錢秋堂露下月出高起視廐中

有駿馬匣中有寶刀佩刀躍馬門前路投主黃金去不顧

車遥遥二首

寒雞喔喔知夜半鄰翁春梁婦炊飯僕夫聞雞趣車起  
欲明未明行十里火輪飛出扶桑霞羲和騎龍鞭日車  
君看日亦無閒時我車安得常在家

車遙遙望望行塵滅但聞上車語不得下車別

秋江詞

煙渺渺碧波遠白露晞翠莎晚泛綠漪蕙葭淺美人立

一作泣

江中流暮雨帆檣江上舟夕陽簾櫳江上樓舟中

米蓮紅蕩香樓前踏翠芳草愁芳草愁西風起芙蓉花  
落秋水江白如練月如洗醉下烟波千萬里

陳卧子云  
輕秀之詞

不傷古質  
所以大雅

### 雙燕篇

雙燕何翩翾飛去仍徊翔依依止畫閣繾綣鳴東廂昔  
來屈陽節今去易寒涼祇恐秋風高海路多煙霜雙飛



入君戶雙棲在君梁被蒙君仁惠彈射不相妨養雛毛羽成送雛還故鄉雖無黃雀報歲願巢君堂

種麻篇

種麻冀滿丘種葵冀滿園孤生易憔悴獨立多憂患當行思故旅當食思故歡先機失所豫臨事多嗟歎升蕭艾乃至鉏桂致傷蘭物理有相附疇能識其端斷金俟同志抱玉難自宣結交良匪易君當圖未然

陳卧子云  
陳思君子

遺之

易水行

寒風夕吹易水波漸離擊筑荆卿歌白衣灑淚當祖路  
日落登車去不顧秦王殿上開地圖舞陽色沮那敢呼  
手持匕首摘銅柱事已不成空罵倨噫嗟嗟燕丹寡謀  
當滅身光也自刎何足云惜哉枉殺樊將軍

莫羅燕

羅雀莫羅燕燕飛在高殿殿高且深誰得見主人垂幕  
高殿中燕來徘徊不敢通楊花落燕出啄童子張羅逐

黃雀黃雀入羅燕入幕

明月篇 有序

僕始讀杜子七言詩歌愛其陳事切實布辭沉  
著鄙心竊效之以為長篇聖於子美矣既而讀  
漢魏以來歌詩以唐初四子者之所為而反復  
之則知漢魏固承三百篇之後流風猶可徵焉  
而四子者雖工富麗去古遠甚至其音節往往  
可歌乃知子美辭固沉著而調失流轉雖成一

家語實則詩歌之變體也夫詩本性情之發者也其切而易見者莫如夫婦之間是以三百篇首乎睢鳩六義首乎風而漢魏作者義關君臣朋友辭必託諸夫婦以宣鬱而達情焉其旨遠矣由是觀之子美之詩博涉世故出於夫婦者常少致兼雅頌而風人之義或缺此其調反在四子之下與暇日為此篇意調若髣髴四子而才質猥弱思致庸陋故摛詞蕪紊無復統飭姑

錄之以俟審音者裁割焉

陳卧子云此序深得風人之旨

長安月離離出海嶠遙見層城隱半輪漸看阿閣銜初  
照歛澹黃金波團團白玉盤青天流影披紅蕊白露含  
輝汎紫蘭紫蘭紅蕊西風起九衢夾道秋如水錦幌高  
褰香霧濃瑣闌斜映輕霞舉霧沉霞落天宇開萬戶千  
門月明裏月明皎皎陌東西柏寢峒堯望不迷侯家臺  
榭光先滿戚里笙歌影乍低濯濯芙蓉生玉沼娟娟楊  
柳覆金隄鳳皇樓上吹簫女蟋蟀堂中織錦妻別有深

宮閉深院年年歲歲愁相見金屋螢流長信階綺櫳燕  
入昭陽殿趙女通宵侍御牀班姬此夕悲團扇秋來明  
月照金微榆黃沙白路逶迤征夫塞上行憐影少婦窗  
前想畫眉上林鴻雁書中恨北地關山笛裏悲書中笛  
裏空相憶幾見盈虧淚霑臆紅閨貌減落春華玉門腸  
斷逢秋色春華秋色遞如流東家怨女上妝樓流蘓帳  
卷初安鏡翡翠簾開自上鉤河邊織女期七夕天上嫦  
娥奈九秋七夕風濤還可渡九秋霜露迴生愁九秋七

夕須臾易盛年一去真堪惜可憐揚彩入羅幃可憐流  
素凝瑤席未作當壚賣酒人難邀隔坐援琴客客心對  
此歎蹉跎烏鵲南飛可奈何江頭商婦移船待湖上佳  
人挾瑟歌此時憑闌垂玉箸此時滅燭歛青蛾玉箸青  
蛾苦緘怨緘怨含情不能吐麗色春妍桃李蹊遲輝晚  
媚菖蒲浦與君相思在二八與君相期在三五空持夜  
被貼鴛鴦空持暖玉擎鸚鵡青衫泣掩琵琶絃銀屏忍  
對瑩瑩淚語瑩瑩淚再彈月已微穿廊入闥靄斜暉歸心日

遠大刀折極目天涯破鏡飛

沈道初云精神韻調駸駸少陵而方駕王盧

詩話初唐四子體今人棄之若土苴矣然其音節宛轉從六朝樂府中來初學者正不可不知也仲默明月篇擬議頗工未墮惡道子美詩云王楊盧駱當時體輕薄為文哂未休爾曹身與名俱滅不廢江河萬里流其論詩之指若此然則初唐亦豈可盡廢乎

送張子

我視人之疾如裁我躬勿曰行弗動勿曰言弗用勿曰

我寡憚彼有衆

顧文玉云章法自楹杖二銘來

清平令



清平縣之令不識何為者庭前長野桑庭後長山櫟猛  
虎上我城青狨啼我舍昨日出城去騎馬到部下部民  
道遮之持刀殺其馬入門顧妻子所居無完瓦秋風吹  
樹木白日落原野永夜空城中哀哀淚如瀉

平越

清晨發平越霧暗山益密僕夫各相戒路遠恐迷失薄  
午游氣清參差衆峰出雞鳴溪谷中始見厓上日雲葉  
分杳冥高原被華實秋風起叢林興感乃非一悠悠遠

行邁歷險難具述

城南婦行

城南有寡婦見客泣數行自言良家女少小藏閨房青  
春嬌素手白日照紅妝父母偏見憐嫁我不出鄉前年  
彌魯亂腥穢入我堂弟兄各戰死親戚俱陳亡嗟哉華  
艷質忍恥罹兇強憂愁雲鬢變辛苦朱顏傷昨聞故夫  
在消息通兩方百金贖我身三年歸舊疆歸來門巷異  
人少蓬蒿長轉盼夫亦死兒女空在窮薄田無耕犢寒

臘無完裳人生固有命妾獨遭此殃況復官軍至燒焚  
廬井荒主將貪賄賂百死不一償朝廷自有法出師亦  
有名妾身何足道無乃乖天常

泊雲陽江頭玩月

扁舟泊沙岸皓月出翠嶺開牕鑒清輝照我孤燭冷高  
林散疎光遠渚接餘景縱橫銀漢迴三五玉繩耿弦望  
幾更易客行尚殊境佳期邈山嶽端坐令人省

沈山子  
云詩品

在大小  
謝之間

五平五仄體

秋原何蕭蕭耳目去襟茸枯荷猶穿塘苦瓠尚抱隴寒  
風吹空林落日照古冢徘徊觀陳蹤露下髮忽竦

孫豹人云

風雅互作襍體並生五平五仄亦具體也此詩不見平仄之迹乃運思之神更有七平七仄如吐舌萬里唾四海七變八曰米出甲離桂飛髻垂纖羅梨花梅花參差開是也

七夕

逝節忽不處佳夕復我臨神飈汎光蕙渥露霑華林緬  
彼牛女會茲端竟難諶形影惜相望胡由接徽音飄飄

翠龍駕髣髴青瑤簪長河坐移轉素波歛西沉靈彩歛  
以晦游雲起層陰同歡戀膠漆異處悲辰參翹思慕遠  
匹感此涕流矜

陳卧子云微詞  
雅奏不減惠連

### 十三夜對月

閒居愛明月良節復與俱金魄麗秋闌皓彩揚雲衢澄  
空斂霜煙清飈蕩中區徘徊廣庭內改席臨方除顧景  
怵衷慮興心念居諸天道遞消長戒之在須臾懷謙可  
久安盛滿豈恒居孰云質靡盈所貴光不渝

十四夜同清溪子對月

林塘枉佳客待月欣舉觴今夕勝昨夕已見生東方離  
離絳霄側冉冉素雲揚踰時灝氣徹縣耀天中央仰視  
渺難即忽覺在我翁清池含微波左右浥流光月行固  
當望人會何能常與子各鄉域邂逅臨此堂良時不屢  
值明月安可忘醉歌荅永夕和我窈窕章

十六夜月

日夕城烟斂列宿出復多開軒望明月展席流素波員

輝雖少虧猶能遍天涯單居

一作說

不為樂念遠徒咨嗟

美人越崇京高樓結綺霞浮雲暮長征何由覩光華迅  
颺萬里至霜霧日以加坐憂桂枝歇委落同泥沙清輝  
苟相照豈慮天路遐

十七夜月

更深月復明揚秀青雲端浮颺倏以寂長川靜波瀾徘徊  
廣除下白露棲崇蘭仰見城西樓迴光照文軒樓中  
織綺女延頸獨哀歎哀歎未終已素河橫西山逝魄不

長望玉貌寧久妍君母客光惠使我芳歲闌

擣衣

涼颼吹閨闥夕露淒錦衾言念無衣客歲暮方寒侵皓  
腕約長袖雅步飾鳴金寒機裂霜素繁杵叩清砧哀音  
緣雲發斷響隨風沉顧影惜流月仰盼悲橫參路長魂  
屢徂夜久力不任君子萬里身賤妾萬里心燈前擇妙  
匹運思一何深裁以金剪刀縫以素絲鍼願為合歡帶  
得傍君衣襟

陳卧子云蕙心蘭質綺羅如在元美所謂却扇一顧時也



擬古詩

名都有高樓上入青雲端修城延曲隅阿閣交重闌佳  
人理清曲當戶橫朱絃揚音來霞裏令顏誰不觀賓客  
會四座絲竹哀且繁日中車馬至薄暮皆來還聽曲各  
言好知音良獨難

淒淒仲秋日百卉腓以殘涼風入階樹零露摧庭蘭明  
月皎東壁昆蟲鳴草間孤鴻暮安適哀音揚雲端眷言  
平生友振翮起一作蕩孤鶩遺我若逝波望子如高山託

忱在終始蓄久諒逾宣寸心不可移磐石誰謂堅

人生百年內胡為形所役登高覽九原但見松與柏徘徊故里間念我平生戚斗酒相存問度阡復逾陌上堂展殷勤華燈永今夕何必傾庶羞濁沽聊與適朱顏難可常鬚髮會當白徧觀四海人誰為不死客良時弗為歡衰暮歎何益死者長不作生者長不息日月更相送萬古安所極素絲有蒼黃岐路多南北在家常相問出門安可測落木歸本根飛鳥戢羽翼客游在萬里終當

還故域

繁霜降秋夜膏火寒無光淒風舉帷幄素月流中房客

行在殊境

一作君子  
事行役

獨處誰與將仰視天上星羅列皆

成行牛女獨何辜  
玆守河梁嗟無臨  
風翼欲去不得  
翔引領長太息  
涕泗徒霑裳

贈王文熙

行子夜中起月沒星尚爛  
天明出城去暮薄長河岸  
草際人獨歸煙中鳥初散  
解纜忽以遙川光夕凌亂

津市打魚歌

大船栽栽繫江岸  
鮎鮎鱖鱖收百萬  
小船取速不取多  
往來拋網如擲梭  
野人無船住水滸  
織竹為梁數如畧  
夜來水長沒沙背  
津市家家有魚賣  
江邊酒樓燕估客  
割髻斫鱠不論百  
楚姬玉手揮雙刀  
雪花錯落金盤高  
鄰家思婦清晨起  
買得蘭江一雙鯉  
篋篋紅尾三尺長  
操刀具案不忍傷  
呼童放鯉撇波去  
寄我素書向郎處

陳卧子云  
調古詞俊

偏橋行

城頭日出一丈五偏橋長官來擊鼓山南野苗聚如雨  
三尺竹箭七尺弩朝出射人夜射虎男解蠻歌女解舞  
殺血祈年暗乞蠱沙蒸水毒草根苦上山下山那敢戲  
蠱爾苗民爾母侮虞庭兩階列干羽

寄李空同

黃河臘月水十丈縱有鯉魚那得上楚天鴻鴈避霜雪  
未得逢春難北向康王城邊沙草曛梁王臺上多暮雲

野人歲晚誰相對桐柏山中空憶君

陳卧子  
云盛唐

官倉行

長棘周袤三丈垣高門鐵鎖絨兩關黃鬚碧衫下殿吏  
白板朱書十行字帳前喧呼朝不休剪旌分隊聽唱籌  
富家得粟堆如丘大車檻檻服兩牛鄉間餓夫立牆下  
稍欲近前遭吏罵

吳偉江山圖歌

吳偉老死不可見人間畫史空嗟美吾觀此卷江山圖

飄然意象臨虛無想當濡毫拂絹素酒酣落筆神骨露  
萬里青天動海岳空堂白日流雲霧洲傾岸側波嶺銜  
島嶼倒影翻源潭江邊萬舸一時發中流颭颭開風帆  
崩濤湧浪勢難久漁子舟人各回首去鴈遙知七澤中  
落花誤認三江口烟峯蒼茫貌二叟面髮衣冠頗麤醜  
石林沙草恣點染舒卷滄洲在吾手憶昨弘治間偉藝  
實絕倫供奉曾逢萬乘主招邀數過諸侯門京師豪貴  
競迎致失意往往遭訶嗔由來能事負性氣輒軻貧賤

終其身嗚呼吳生不復得剩水殘山轉悽惻此卷流傳  
天地間我即見汝真顏色

吳偉飛泉畫圖歌

長安獨過田子舍留我一翫飛泉畫絕壁如聞風雨來  
晴天安得蛟龍挂吳生跌宕得畫理潦草落筆皆可喜  
飛泉却出沓嶂間山即真山水真水客堂六月生畫寒  
耳中髣髴高江灘源潭窈窕不可測波浪洶湧多奇觀  
泉邊二老顏色異偶坐似是莊與惠萬里誰論到海心



百年詎識臨淵意偉哉田子今儒宗文標南指匡廬峰  
不須對此更惆悵會觀瀑布青天上杉風松日隔縹緲  
雲瀧雪瀨何雄壯我常夢往神空向豈無吳生好手筆

為我寫寄廬山障

吳明卿云氣韻生動畫中山水人物歷歷如覩

### 畫魚

大魚昂藏若人立衝波跋浪風江急翫觀二鯉各有神  
倏忽波濤隨出入中堂鬚鬣動杳冥坐久始識為丹青  
青天萬里拂絹素筆力咫尺開滄溟禹門天池雲霧裏

白晝雷霆行地底何人有力移置此酒酣相視一改容  
只愁化作三蛟龍

楊用修云雄奇排宕直踞少陵之壘可奪獻吉之幟

子昂畫馬歌

學士宋王孫畫馬皆龍姿曾寫飛黃出天廐尚留雲影  
落瑤池池頭馬官錦鞞袴緩鞚長牽時拂顧萬里精神  
開絹素百年馬鬣生風霧吁嗟內乘無人識想見奔騰  
過都國翠仗朱軒數往來金羈玉勒增顏色只今天子  
罷南征又聞東巡遼海城安得四馬忽然生登臺一顧

千金輕天上長隨八駿行

鄭平子云仲默畫馬二篇比之杜陵雄偉少遜而逸宕有

餘

### 畫馬行

畫馬如畫龍縱橫變化當無窮吾觀月山子落筆窺神  
工曾向天閑貌十萬十萬意態無一同此馬傳來幾百  
年古絹猶開沙漠風樹裏河流新過雨簇簇草芽寒刺  
水圍人雙牽臨水邊草色離離亂雲綺令人疑到渥洼  
翁波底風雷鬪龍子細看不是白鼻騮恐是當朝獅子

花紫燕纖離各惆悵其餘劣何足誇憶昔愛馬不惜  
千金貨君王勤政樓頭坐奚奴黃衫雙繡鞞廐中騎出  
樓前過紅帕初籠汗血香玉鞭輕拂桃花破吁嗟玩物  
竟何益遺跡徒使丹青播只今烽火西北來沙場未聞  
千里才千里才固有時回頭為問御者誰君不見古人  
養馬如養士一飽能酬千里志今人養馬如養豚廐下  
常推瘞藜刺古之良馬何代無可笑今人空按圖

詩話仲默題畫諸篇源出  
少陵匪徒貌似神亦似之

辰溪縣

早發辰溪渡清川喜泛舟山城歌粉堞江驛映朱樓雨  
驟沙頽岸天寒水露洲蠻音聞漸異迢遞動鄉愁

峽中

自昔偏安地于今息戰侵江穿巫峽隘山鑿鬼門深濁  
浪魚龍黑寒天日月陰夜猿啼不盡淒斷故鄉心

月

片月中秋近輝光一歲無天清驚塞鴈夜冷落楓烏不

寐知宵永無言對影孤更深何處沒萬里墮江湖

殿試宿禮部和馬張二光祿喬直閣諸公

東閣春朝晚南宮夜宿深鎖闌猶月色開閣更松陰地

迴神仙接天低象緯臨諸君清廟作三歎有餘音

蔣春甫云

下字虛實俱鍊

懷沈子

沈生南國去別我獨悽然落日清江樹歸人何處船十年安陸舍數口太湖田想到鄉園日生涯亦可憐

沈山子云

極似  
裏陽

十四夜

水際浮雲起孤城日暮陰萬山秋葉下獨坐一燈深白露  
蕪葭落西風蟋蟀吟關山今夜月橫笛有哀音

送曹端卿謫尋甸

逐客滇南郡雲天此路長高秋行萬里落日淚千行作  
賦投湘水題書寄夜郎殊方氣候異去矣慎風霜

陳卧  
子云

似高  
常侍

九日夜過劉以正別士奇

重陽愁獨酌深夜喜相過  
萬里惟秦客三杯亦楚歌  
霜茄沈海月風鴈起滹沱  
醉別黃花去能忘白玉珂

送彭總制之西川

蜀道青天上岷山赤日西  
九重連授鉞萬里動征輦  
開府松杉靜懸軍玉壘低  
知公安蜀計諸葛大名齊

楊用修云

森嚴莊重

得五清先生客澧州消息悵然有懷



憔悴東都士吾師更可嗟三年為逐客萬里未還家暮  
阻巴山雪春行楚岸花江湖無路覓流涕望天涯

詩話五清先生內江人南京禮部右侍郎贈尚  
書謚文肅劉公瑞也字曰德符山東按察僉事時  
穀之子中弘治丙辰進士正德丁丑以按察副  
使提督浙江學政明年六月廣購經史子集發  
十一府儒學公貯備覽每冊隸書于序尾鈐以  
關防今各府俱散佚人間予每每見之惟湖州  
府學尚多存者予家所抄施宿張湔會稽二志  
乃其所儲本也又嘗于峴山建三賢祠以祀唐  
刺史顏公真卿宋知州事蘇公軾王公十朋則  
已卯年事也留心風教若此可謂克盡其職儻  
學使者悉如公所為士風吏治何難丕變予以  
為三賢祠在宜作粟主并祀公斯則賢有司之

賁矣公有五清先生集十八卷又外  
臺集六卷訪之未獲故附識於此

關門

虎衛關門迴龍沙塞曲深風雲時有氣日月晝長陰中

使西來訊千官北望心天塞漢宮闕翠蓋憶春臨

吳明卿云

氣骨清蒼 陳卧子云  
似武皇在宣府時作

觀兵二首

將帥俱分閫朝廷再剖符選徒皆虎士戰馬盡龍駒直  
拍黃河外長驅碧海隅感恩須此輩萬一為捐軀

組練回天地戈鋌白日搖王師一奮怒寇賊可潛消使  
過傳金節軍行奏玉簫人言漢家將今是霍嫖姚

登堅山寺

西峰插天起絕頂寺門開雲裏一僧住山中無客來落  
花平講席積草偏香臺我欲聞清楚梵香坐不回

武關

北轉趨劉壩西盤出武關微茫一線路迴合萬重山天  
地幾龍戰風雲惟鳥還關門鎖溪水日夜送潺湲

中秋無月

月賞今年罷高樓，獨客愁關山中夜笛。  
江漢故鄉舟暗雨，梢檐入秋螢度檻流。  
應知雲霧上天柱，有人遊

昭烈廟

漂泊依劉計，間關入蜀身。  
中原無社稷，亂世有君臣。  
峽路元通楚，岷江不向秦。  
空山一祠宇，寂寞翠華春。

黃清甫云

匪直僞詞  
亦存名教

艷曲

御溝連上苑大道接平沙  
紜陌三千騎青樓十萬家  
城中楊柳樹風起暮飛花

武昌聞邊報

傳聞曠騎近長安  
北伐朝廷已命官路繞  
居庸烽火暗城高山海  
戍樓寒一時邊將當關  
少六月王師出塞難

先帝恩深能養士  
請纓誰為繫樓蘭

姚仙期云孝宗御媛閣語輔臣劉健

云臨陣以軍法從事所擬太重恐邊將起輕殺之漸此亦恩深能養士之一也

溪上

溪上茅齋不掩扉  
西風初罷芰荷衣  
月寒沙柳蕭蕭落  
天晚江鴻肅肅飛  
野客行吟水邊立  
家人沽酒夜深歸  
相逢醉語休辭數  
城外黃花漸覺稀

答雷長史

十載寒羶鄭畫師  
風流文采更堪思  
朱門鼓瑟官仍達  
青殿揮毫出每遲  
百里風烟還薄暮  
孤城雨雪已多時  
極知歲晚傷心切  
起傍官梅自詠詩

聞河南寇

檄書近報河南寇楚塞梁關轉戰空豈有兵車能遠救  
即愁道路阻難通江淮城塹西南險嵩洛山川天地中  
今日至尊憂不細幾時諸將捷音同

西海子

寺下烟波春不開苑中風浪隱樓臺泉源細繞西山出  
雲氣深從北極來萬里乘查觀日月十年登閣望蓬萊  
黃塵碧水須臾事莫使魚龍夜夜哀

吳明卿云雄渾道  
逸陳卧子云意

景皆摹

少陵

小閣初開崔郭田三君子至

本買堂齋為客居，敢扳冠蓋枉吾廬。  
清風坐下高人榻，深夜門停長者車。  
竹下涼蟾輝几杖，花間螢火靜琴書。  
黃門翰苑俱鄰近，濁酒盤餐意不疎。  
穆敬甫云：風致如月出石渠芙蓉散華。

送雷長史

彤管先朝隨帝子，白頭今日奉王孫。  
漢庭亦羨相如美，楚客重看賈傅尊。  
花下圖書開玉殿，日高琴瑟在朱門。



十年亭閣淮西宴腸斷梁王雪夜樽

陳卧子云潦倒遲暮寫得可念

### 得獻吉江西書

近得潯陽江上書遙思李白更愁予  
天邊魑魅窺人過日暮黿鼉傷客居  
鼓柁襄江應未得買田陽羨定何如  
他年淮水能相訪桐柏山中共結廬

### 送施聘之侍御

海甸春風攬轡情燕關驄馬去還鳴  
繡衣霄漢花間出錦纜江湖樹裏行  
近日西臺多諫草少年南國有詩名

別絃更憶風流調愁聽東城二月鶯

宗子相云綺語逸韻恍對王謝風流

鮒魚

五月鮒魚已至燕荔支盧橘未應先賜鮮偏及中璫第  
薦熟誰開寢廟筵白日風塵馳驛騎夫天冰雪護江船  
銀鱗細骨堪憐汝玉箸金盤敢望傳

送衛推官之武昌

少年佐郡楚城居十郡風流盡不如此去且隨彭蠡鴈  
何須不食武昌魚仙人樓閣春雲裏賈客帆檣落照餘

大別山前江漢水畫簾終日對清虛  
穆敬甫云風度若  
鯉躍晴波鳥鳴春

谷

獨立

獨立對花陰冥冥望河渚只見沙上烟不見烟中雨

盤屋清明日

獨樹桃花自發高樓燕子誰家可惜年年春色催人白  
髮天涯

江南思

燈下雨鳴秋舫浦口潮迴暮鐘何處相思不見江南開  
徧芙蓉


送韓汝慶還關中

華岳雲臺萬里情  
高秋落日眺秦城  
黃河一線通滄海  
身在仙人掌上行

秋日雜興二首

野亭千橘未全黃  
青柿紅梨盡待霜  
南鄰老翁種橡栗  
已見兒童收滿牀

紫蔓青藤各一叢野人籬落管西風郊扉遠絕誰能到  
秋日蟲鳴豆葉中



明詩綜卷三十五